



**Les Fleurs Des Vies Des Saints Et Des Festes De Toute  
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromee, & de Sainte Françoise ; Avec le Mertyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

VII La vie de saint Stanislaus Euesque & Martyr.

---

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

6.  
MAY

sa saincteté de priuer Leon de l'Empire, & d'en eslire vn autre qui fut Catholique : de maniere, que l'Italie se reuolta, & le Pape iettant les yeux sur la France, implora la faueur de Charles Martel Prince valeureux, & puissant : & du depuis l'Empire de l'Orient fut transferé en l'Occident. Il survint aussi vne telle famine & pestilence, qu'à la seule ville de Constantinople, il mourut trois cens mille pesonnes. Les Sarrazins se ietterent dans les Prouinces de l'Orient, ruinerent toute la Capadoce, & d'autres villes de l'Asie mineure. Outre ces calamitez, Dieu enuoya des horribles & espouuantes tremblemens de terre, & des plus grands qu'on ait iamais veu. Peu de temps apres l'Empereur Leon mourut miserablement : pour monstrier qu'encore que le chastiment entier des meschans les attende en l'autre monde, neantmoins, quelquesfois Dieu veut qu'on en voye des arres des ceste vie, pour nous seruir d'exemple : ce que j'ay particulièrement touché, afin que les heretiques de nostre temps scachant que come ils s'ont imitateurs de l'impiereté de l'Empereur Leon, faisans renaistre les erreurs tant de fois condamnez par les Conciles de l'Eglise Catholique, ils pourront estre aussi participants de ses peines : car ils veulent oster les Images de Iesus-Christ, & ses Sainctes, qui ont esté honorées dès la primitiue Eglise, de la veneration desquelles il reuiet vne si grande gloire à Dieu, & honneur à ses sainctes, edification des fideles, & exemple aux doctes, lumiere & instruction aux ignorans, confusion & vergongne aux heretiques mesmes. Mais pour retourner à nostre Damascene, qui illustra l'Eglise par sa doctrine, & escriuit si elegamment, que les Grecs le surnommerent Chrysooras, duquel on dit particulièrement qu'il estoit fort soigneux de corriger ce qu'il composoit, & que les mots fussent mesurez, propres & significatifs, les sentences grâdes & vtils, la disposition apte & conuenable, ne méritant rien en ces escrits, qui ressembloit ostentation & vanité.

Damascene ayant long-temps vescu en son Monastere, avec vn grand Exemple de saincteté, & seruy si dignement nostre Seigneur par tant de travaux, acheua en fin son pelerinage, & alla iouir éternellement de ce Souuerain qu'il auoit tant aymé, & desiré de luy ccomplaire. Le Martyrologe Romain fait mention de saint Iean Damascene le sixiesme de May, encore que comme a remarqué le Cardinal Baronius, d'autres mettent son decez en diuers iours, & entre les Grecs mesmes, les vns le celebrent le vingt-neufiesme No- uembre, & d'autre le quatriesme Decembre. Iean Euesque de Hierusalem escriuit sa vie, qui est rapportée par Surius au troiesme Tome, de laquelle, & de ce qu'en escriit le Cardinal Baronius au neuuesme Tome de ses Annales, & autres auteurs, nous auons composé ce discours. Faut prendre garde, que Triteme & quelques vns, font deux Ieans Damascenes, l'vn qui vescu du temps de l'Empereur Theodose le Grand, & fut prestre & Abbé des Religieux de Constantinople, qui escriuit les liures de la Foy Orthodoxe :

& vn autre qui vescu du temps de l'Empereur Leon Isaurien, cõtre lequel il escriuit les oraisons que nous auons en la deffense des Images : neantmoins c'est la verité qu'il n'y en eut qu'vn, qui est cestui-cy, lequel composa toutes ces œures, ainsi si que nous auons dit, & le Cardinal Baronius l'aferme, & auparauant luy Iacques Billy homme docte, qui a de nostre temps redressé en meilleur ordre les œures de saint Iean Damascene.

*A tel iour Saint Iean Apostre & Euangeliste, ayant esté le commandement de l'Empereur Domitian, conduit, & gerré de la ville d'Epheuse, iusques à Rome, fut par sentence du Senat mené durant la porte Latine, & là plongé dans vn tonneau à eau le bouillante, duquel il sortit plus net & plus allegre qu'il n'y estoit entré. En Antioche endura le martyre saint Euede, lequel comme escriit saint Ignace en l'Epistre aux habitans d'Antioche fut le premier Euesque dudit lieu, sacré par saint Pierre. En Afrique trespasserent les sainctes Heliodore & Venuste, avec autres soixante & quinze martyrs. A Cyrene saint Luc Euesque, duquel saint Luc fait mention aux Actes des Apostres. En l'Isle de Cypre saint Theodote Euesque de Cyrene eut beaucoup enduré sous Licine Empereur, mourut au temps que l'Eglise fut remis en paix. A Charrie ville de Mesopotamie saint Protogenes Euesque & Confesseur. En Angleterre saint Eadbert Euesque de Lindisfarne, renommé pour sa doctrine & deuotion. A Rome sainte Benoiste vierge. A Salerne ville du Royaume de Naples se fait la feste de la translation du corps saint Mathieu Apostre, le corps duquel y fut porté des quierens d'Ethiophie, & honorablement mis sous le maistre Autel de la grande Eglise, bastie en l'honneur dudit Sainct, au temps du Pape Gregoire VII. de ce nom.*

LA VIE DE SAINT STANISLAV,  
Euesque & Confesseur.



E bien-heureux saint Stanislaus Euesque & Martyr, naquit en la ville de Cracouie, capitale du Royaume de Pologne, de parents riches & nobles, lesquels apres auoir demeuré trente ans en mariage, sans auoir des enfans, ils obtindrent de nostre Seigneur Stanislaus, par leurs larmes & prieres. Dès son enfance, il donna à presumer ce qu'il deuoit estre, ayant l'esprit propre pour toute sorte de sciences, estant au reste plein de pudeur, de modestie, & d'honnesteré en ses façons de faire. Il estudia premierement en la ville de Gniene, depuis en l'Vniuersité de Paris les Arts liberaux, le Droit Canon, & la Theologie, esquels il se recedit fort versé. A son retour il trouua que ses parents estoient morts, de sorte qu'il distribua incontinent aux pauvres les grands biens qu'ils luy auoient laissez. Il eut desir de renoncer à toutes les choses du siecle, & se faire Religieux : neantmoins, nostre Seigneur & Redempteur Iesus-Christ qui se vouloit seruir de luy autre part, permit qu'il fut Chanoine & Predicateur, & successi- uement Euesque de l'Eglise de Cracouie, à laquelle il succeda à Lampert. Il accepta la charge avec beaucoup de resistance & de difficulté, seulement de peur de resister à la volonté de Dieu qui l'appelloit, & se vouloit mettre dessus le chandelier, comme vn flambeau allumé, pour eclaire

par la lumiere de sa vie & doctrine à tout ce peuple qui luy balloit en garde.

La saincteté, la vigilance, la prudence & la valeur de ce Sainct, fut admirable au gouvernement de son Euesché, sa charité & misericorde enuers les pauures necessiteux. C'estoit le plus humble de tous, doux aux foibles, seueré aux rebelles, pieux aux affligés, patiens aux iniures, terrible & zelé en celles de Dieu. Boleslaus fils du Roy Casimis, estoit lors Roy de Pologne, lequel du commencement fit preuve de sa valeur és guerres qu'il eut contre les Russiens, mais il se perdit depuis és voluptez, & s'adonna à toutes sortes de vices & lubricitez, se transformant en vne beste, non seulement charnelle, mais aussi cruelle, & aide d'espandre le sang humain. Et comme les vices des Princes sont plus remarquables & pernicioeux, tout le Royaume de Pologne estoit scandalisé & affligé du mauuais exemple, & de la tyrannie de leur Roy. Il sembla à Stanislaus qu'il estoit obligé en qualité de Pere spirituel, d'aduer-tir Boleslaus de ses débordemens: ce qu'il fit avec vne grande humilité, & modestie, le suppliant par plusieurs fois de se déporter & retenir, considerant que les pechez des Roys sont plus ords que ceux des personnes priuées, tant parce qu'ils sont plus obligés à Dieu qu'ils a fait Rois, que pour le grand preiudice que cela fait à tout le Royaume, lequel s'infecte par le mauuais exemple de son Roy. Que s'il ne se corrigeoit, il se pouuoit bien assurer que Dieu l'en puniroit, & peut-estre luy osteroit l'authorité, & le prieroit du Royaume qu'il luy auoit mis en main. Boleslaus print en fort mauuaise part la saincte remontrance de l'Euesque, d'autant qu'il ne se vouloit pas desister de sa mauuaise vie, ny qu'il eust personne en son Royaume si hardy, que de luy faire vne reprimende. Il se resolut de persecuter Stanislaus, & le faire taire, bon gré, mal gré, en le chassant de son Eglise, & quoy qu'il n'en eust aucun veritable suiet pour l'entreprendre, il en inuenta vn specieux.

Le sainct Euesque auoit acheté l'heritage d'vn homme riche, nommé Pierre, pour son Eglise, & luy en auoit payé l'argent, neantmoins, il n'auoit point d'acquit pour en faire apparoir. Il y auoit desia trois ans que le maistre de cét heritage, duquel il l'auoit acheté, estoit decedé, & ses heritiers pour faire plaisir au Roy, & profiter de ceste occasion, mirent l'Euesque en procez, disans qu'il auoit vsurpé leur terre & heritage qui leur appartenoit. L'affaire fut traitée deuant le Roy, l'Euesque estant destitué des acquits necessaires, & que les tesmoins qui scauoient la verité, ne l'osoient dire, à cause du Roy, fut condamné à deguerpir la possession & iouissance de la dite terre. Voyant cela, il demanda trois iours de delay pour faire comparoir en personne Pierre son auteur, qui estoit mort il y auoit trois ans, comme nous auons dit. Ils le luy accorderent par mocquerie. Le Sainct ieusna, veilla, & pria instamment nostre Seigneur Iesus-Christ de defendre sa cause: au bout de trois iours, apres auoir deuotement celebré Messe, ils'en alla au tóbeau

où Pierre estoit entré, il fit oster la tombe, fouyt la terre, & descourir le cadauer, lequel il toucha de son baston Pastoral, & luy commanda de se leuer. Le mort obeit soudain à la voix du Sainct viuant, se leua, & par son commandement le suivit en Iustice, là où le Roy, les Grands & les Iuges de sa Cour estoient assemblez. Stanislaus, leur dit: Voicy Pierre: qui m'a vendu l'heritage, qui est resuscité, pour se trouuer deuant vous, interrogez-le, si ce n'est pas la verité, que ie l'ay payé entierement, ce qu'il me vendit pour l'Eglise. C'est vn homme cogneu, sa sepulture est ouuerte, de laquelle Dieu l'a resuscité, pour confirmer la verité. Sa parole doit estre plus ferme & croyable, que toutes les depositions des tesmoins, ny les enseignemens qu'on scauroit produire. Les parties aduerses du sainct Euesque demeurèrent tous esperdus & transis de ce miracle si euident. ne sceurent que repliquer, parce que Pierre declara entierement la verité, & aduertit ses heritiers de faire penitence d'vn si grand peché, d'auoir ainsi molesté Stanislaus contre tout droit & iustice, lequel luy offrit, s'il vouloit encore viure quelques années, de les luy obtenir de nostre Seigneur Iesus-Christ. Mais Pierre aima mieux retourner à sa sepulture en son repos, que de mener vne vie si pleine de perils & d'angoisses, & die au Sainct qu'il estoit en Purgatoire, & n'auoit plus gueres de temps à y demeurer, pour acheuer d'expié les pechez qu'il auoit commis durant sa vie: & qu'il ayroit mieux estre assuré de son salut, encore qu'il endurast les peines qui luy restoié à souffrir, que de se mettre en hazard de le perdre entrant dans ce gouls & tourmentes de la mer de ce siecle orageux: mais qu'il le supplioit de faire tant enuers nostre Seigneur qu'il luy remit ses peines, & le rendist bien tost iouissant de sa gloire avec les bien-heureux. Apres cela Pierre s'en retourna à sa sepulture accompagné du sainct Euesque, & d'vne grâde multitude de peuple, il s'agença dans sa fosse, priant toute l'assistance de le recommander à Dieu, & mourut la seconde fois, pour viure eternellement.

Qui n'eust esté conuertý d'vn miracle si notable & manifeste que celuy-cy? quelle poitrine de fer ne se fust amolie & amendée, voyant vn homme resuscité, & qui ayma mieux demeurer en son tombeau, que de viure en ceste fragile & miserable vie? Mais le cœur du Roy estoit si acharné aux vices, enraciné en ses voluptez, que cela ne fust bastant pour l'en retirer & ramener au bon chemin: au contraire, comme vne beste farouche, il se plongeoit dans le sang de ses suiets innocens, & comme vn animal immonde, il se veautroit dans la fange de ses lasciuetez, avec vn scandale notable du Royaume. Stanislaus vsa premierement de remedes & lenimens les plus doux qu'il peut trouuer pour guarir cét vlcere enuielly, & voyant que tous ses medicamens demouroient sans effect, il fut contraint d'y appliquer le fer & le feu, le retranchant de la Communion des fidelles, comme vn membre pourry, afin que ce coup le fist retourner en luy-mesme, & s'amender, ou bien s'il se vouloit perdre, qu'il ne

7. MAY — tirast point apres soy l'entiere subuersion du Royaume. Neantmoins, le Roy, comme vn second Pharaon s'endurcit de plus en plus aux fieux de Dieu, & scachant que l'Euesque alloit dire la Messe à vne Eglise de saint Michel, il enuoya ses satellites pour l'en tirer dehors, & l'arracher des coins de l'Autel, s'il en eust esté besoin, pour le massacrer. Ils s'y en allerent, & comme ils voulurent mettre les mains sur le saint, qui celebrait la Messe, vne lumiere celeste les espouuanta & renuerfa par terre, sans qu'ils peussent executer leur meschanceté. Il en arriua autant par deux & trois fois d'autres soldats que le Roy y auoit enuoyez pour le mesme effet. Bolelaus y estoit venu en personne pour se trouuer à ce spectacle barbare, & contenter ses yeux de la mort de celui qu'il tenoit pour son cruel ennemy. Et voyant que les bourreaux espouuantez s'en retournoient en arriere, sans pouuoir executer le commandement de leur maistre, il les reprint de leur pusillanimité, & attaqua luy-mesme le saint luy donnant vn si grand coup d'espée sur la teste, qu'il en fit reialler la ceruelle contre les murailles. Cela fait, ceux de sa garde le percerent de coups à l'Autel où il estoit, & mirent en pieces ses membres sacrez, qu'ils ietterent dans les champs, pour seruir de proye aux oyseaux & aux bestes. Mais nostre Seigneur enuoya de quatre costez quatre grands Aigles qui se tindrent autour du corps, & le defendirent miraculeusement deux iours entiers. De nuict, on voyoit en l'air plusieurs lumieres sur les saintes Reliques. Quelques Prestres & personnes pieuses esmeus de ce miracle, qui auoient du commencement apprehendé la cruauté du tyran Bolelaus, s'enhardirét de recueillir ses saintes membres espars, & de les assembler, lesquels par vn autre miracle, se reioignirét aussi parfaictement que s'ils n'eussent iamais esté diuisez, & sans qu'il y apparust aucune cicatrice de tant de coups. Ils enterrenterent le corps à la porte de ladite Eglise de saint Michel, où il auoit esté assassiné. A dix ans de là ils le transporterent dans la ville de Cracouie, & l'enseuelirent au milieu de l'Eglise de la fortresse avec vne grande pompe funebre.

Il n'est pas croyable combien cela fut trouué mauuais par tout le Royaume de Pologne, & és autres de la Chrestienté, & ce que tous les bons ayans sceu ce cas horrible & espouuenable, prediront des calamitez & defastres, qui deuoient arriuer sur ce mal-heureux Roy.

Le Pape Gregoire VII. ne pouuant laisser vn crime si atroce impuny, & l'iniure insupportable que l'Eglise y auoit receu; mit le Royaume de Pologne en interdiction, excommunia & anathematisa le Roy Bolelaus, & le priua de son Royaume, enioignant aux Euesques de n'oindre ny sacrer aucun Roy sans licence: priua tous ceux qui estoient interuenus à la mort du saint Euesque & Martyr, & eux & leur posterité, iusqu'à la quatriesme generation, de toutes les charges, offices, benefices & reuenus Ecclesiastiques. Le miserable Roy abhorré d'vn chacun, & tourmenté du cruel bourreau de sa propre cōscience, s'enfuyt de Pologne en Hongrie, où quelque temps

apres, ne se pouuât plus souffrir, il se tua soy-mesme, encore que d'autres disent qu'allant à la chasser il tomba de dessus son cheual, & fut mangé de chiens. Aucuns disent qu'il fit penitence, & qu'il demeura incogneu en vn Monastere, seruant la cuisine iusques à sa mort.

Le decez de saint Stanislaus (selon Martin Cromer) arriua l'an de nostre Seigneur 1079. le 11. d'Auril, & depuis son corps fut transporté le huitiesme de May; encore que ce iour estant occupé à la celebration de l'Apparition saint Michel, l'Eglise celebre sa feste le septiesme May. Depuis l'an 1253. 174. ans apres sa mort, Innocent IV. le canoniza, & mit au nombre des saints Dieu ayant operé de nouueaux miracles, pour honorer & magnifier ce saint Euesque & Martyr. Et nostre saint Pere Clement VIII. a commandé que la feste de saint Stanislaus fust mise au Breuiare Romain, & que toute l'Eglise Catholique la celebrast d'vn office double. Ceste vie est tirée de Laurens Surius au second Tome des vies des Saints, l'onziesme Auril, & de Jean Longen Chanoine de Cracouie, & de la Vendalie, d'Albert Krantz au troisieme liure, és Chapitre douze, treize & quatorze, & de Martin Cromer, Auteur fort graue, en son Histoire des choses du Royaume de Pologne, à la fin du liure quatrieme, & au commencement du neufiesme liure des Leçons approuuées par l'authorité du S. Siege Apostolique.

*A Tarracine en la Champagne d'Italie, se fait la feste de sainte Flauie Domitille vierge & martyre, laquelle estant fille de la seur de Flauie Clement Consul: & ayant receu le saint vniuers de la main de saint Clement Pape, fut du temps de l'Empereur Domitian avec plusieurs autres, bannie en l'Isle Pagan, où elle demeura long temps, & puis estant mené à Tarracine, comme par sa doctrine & miracles elle conuertit vne infinité de peuple à la Foy de Iesus-Christ, le Iuge commanda qu'on mist feu à la chambre où elle demouroit avec deux autres vierges Euphrosyne & Theodore, leur donnant ce moyen d'accomplir glorieusement leur martyre. A mesme iour trespassa saint Iuenal martyr. A Comidia les saints Flauie Auguste & Augustin freres. Au mesme lieu S. Quadras ou Quarre, lequel ayant esté plusieurs fois repris pour estre tourmenté, eut en fin la teste tranchée. A Rome mourut saint Benoit Pape, lequel succedant à Leon II. fit beaucoup de saintes auures. A Euranche en Angleterre saint Jean Euesque renommé pour sa sainteté & miracles. A Rome se fait la feste de la translation du corps de saint Eusebe premier martyr, lequel du temps de Pelage ou Marin Pape fut porté de Constantinople en l'Eglise de saint Laurent, hors des murailles de Rome, & mis dans le sepulchre du mesme saint où il est reueré avec grande deuotion.*

#### L'APPARITION DE SAINT MICHEL l'Archange.

**M** OVT ainsi que la diuine bonté a donné à son Eglise pour Prince & defenseur le glorieux saint Michel Archange, comme elle l'auoit auparavant baillé à la Synagogue: elle a aussi voulu en diuers temps & lieux faire des choses merueilleuses,